

四庫全書

史部

欽定四庫全書

史部

三吳水考卷十二

詳校官監察御史_臣周元良

刑部郎中_臣許兆椿覆勘

總校官檢討_臣何思鈞

校對官中書_臣李斯咏

謄錄監生_臣薛炳文

欽定四庫全書

三吳水考卷十二

明張內蘊周大韶撰

奏疏考

差滿留差疏

南京都察院右都御史臣曾等謹題為高寶湖隄大壞
蘇松水利久湮懇乞聖明特勅憲臣督理以裨國計事
據巡按直隸監察御史林呈稱先奉南京都察院劄付

奏差本職督理蘇松水利續奉本院劄委帶管巡視下江除欽遵依奉俱於萬歷四年十二月二十日到任管理外至萬歷六年四月二十五日又奉本院劄付准都察院咨該本院右都御史汪等題該都察院覆題看得蘇松水利一差帶管下江委爲順便但今濬治吳淞江等處勘脩伊始則水利爲急故以三年爲限至三年之後功績槩見則挑濬差緩應以下江帶管水利仍以一年爲限因覆題奉欽依移咨前來脩劄到職又經欽遵

外令照前差連閏扣至萬歷七年十一月十九日三年
差滿理合預呈題請差官更替等因到院臣等看得下
江之差原限一年後以水利兼管展限三年蓋欲責以
成績也今本官奉命督理開鑿常鎮運道疏濬吳淞湖
港區畫得宜規為有漸據呈差滿即應更替但近值水
澇工役暫停以本官心思運用之久可必有成若一旦
改差恐玩前功且遲後効東南財賦所係非輕似失原
領專勅之意且各道御史見存六員俱有專差又難兼

理合無仍將本差再行本官令其悉心經理務以一年之內告成滿日造冊復命請官交代庶責成既專功效可奏而國計民生均有攸賴矣伏乞勅下都察院再加詳議上請定奪為此具本謹題請旨

吳塘顧浦工完疏

巡按直隸監察御史臣林謹題為查通水利議處荒田以甦民困以充國賦事據整飭蘇松常鎮兵備湖廣按察司按察使徐節呈萬歷六年八月二十一日蒙本院

案驗奉南京都察院劄付准戶部咨四川清吏司案呈奉本部送准工部咨該本院題前事看得蘇州府屬崑山嘉定二縣安亭地界吳塘顧浦皆幹河也北通劉家河以接海潮南通吳淞江以吞湖水三四十里之內俱賴蔭灌就中起運錢糧不下三萬餘石近因淤塞旱澇無備宜急開濬但工費頗煩計該用銀三千餘兩今各區人戶逃竄村落爲墟責以出辦其孰能與似應召募附近熟地區民量給工食方能有濟容臣會同撫按官

另行設處刻期興工等緣由該本部覆奉欽依移咨南京都察院備劄本院案行本道查照題奉欽依內事理即行委官踏勘吳塘顧浦開濬工程丈算土方計處工費錢糧派募夫役定委管工員役分段督理并興工一應事宜開列條款逐一覆核停妥陸續詳行等因蒙此案照本年五月初九日先蒙本院批據嘉定縣知縣徐上達呈濬吳塘顧浦緣由蒙批兵備道議報隨經行據蘇州府水利同知王事聖呈議吳塘顧浦二河太倉州

應開一千四百六十九丈議令坐區開濬嘉定縣應開
吳塘五千三百五十七丈五尺內易開四千三百五十
七丈五尺每丈用夫十名該夫四萬三千五百七十五
名每夫工銀一分該銀四百三十五兩七錢五分淤塞
難開河一千丈每丈用夫二十名該夫二萬名每夫工
銀一分該銀二百兩南北壩二條用夫五百名每夫工
銀一分該銀五兩又開顧浦河三千三百四十五丈每
丈用夫十五名該夫五萬一百七十五名每夫工銀一

分該銀五百一兩七錢五分南壩二條用夫一千五百
名北壩一條用夫二百五十名每夫工銀一分該銀一
十七兩五錢共該夫銀一千一百六十兩合動導河夫
銀其挑夫用槩縣塘長齊集照田編夫又崑山縣應開
顧浦河一千三百八十七丈起集民夫約日興工等因
備申到道該前任兵備按察使馮叔吉覆議得吳塘顧
浦二河年久淤塞係闕太倉嘉定崑山三州縣開濬據
議太倉崑山皆令得利人夫開挑已無他詞嘉定丈尺

獨多工銀費繁比照吳江開濬事體將民欠導河夫銀
內令欠錢人戶認方開濬以銷名下欠數官民兩便等
因具由於萬歷七年正月二十一日呈蒙本院批開據
所議吳塘顧浦工役除太倉州崑山縣議令得利人夫
開挑似屬無詞俱如擬行其嘉定縣工役浩繁以所欠
銀戶扣工開土雖為官民兩便但該縣歲歉民飢視之
太倉崑山不同若盡責之枵腹胼胝恐或不能如式也
該道一面行王同知會同各州縣官刻日興工一面行

查該縣見貯夫銀若干本院見在抵贖若干以外仍設處銀兩務足三分之一以備犒賞以助飢餒庶幾民有所鼓舞而易以竣事也工完通行冊報繳又經行據嘉定縣申開約用夫一十一萬六千工每工先給米一升該米一千一百六十石每石准銀五錢該銀五百八十兩查有縣庫導河夫本縣抵贖及本院項下抵贖罰銀共六百兩五分堪以動用隨該按察使馮叔吉覆議行縣准將庫銀照數動支五百八十兩買米一千一百六

十石每夫給米一升該縣給塘長分散各夫餘該夫銀
五百八十兩准令各塘長於原欠導河夫銀內扣除免
徵其開河淤土必堆二十丈之外但不至二十丈之外
者究罪另開仍支本道贖銀二百兩發縣另買米四百
石以為遠挑開土之助再照太倉崑山去歲亦屬歉收
塘老紛紛具告亦有願助之望太倉該五萬二千四百
五十工亦每工給米一升俱動本道贖銀二百五十兩
發與買給崑山縣該一萬七千七百一十五工每工准

灘田銀一分五釐筭銷免追所挑淤土亦必至二十丈之外如不合式不准給助等因具由於本年三月初一日通呈蒙本院批開嘉定縣既查有見貯堪動銀兩而太倉崑山二州縣之夫該道復推及之恤民濟衆之道具見矣各如議行處給其堆土務在二十丈之外尤為開河要法該道即行出示曉諭敢有員役怠違及侵剋工米者通行拏究此繳又奉撫院批開太倉嘉定量給食米崑山一縣計工免通於民隱甚周悉矣俱依議行

挑土一節務令二十丈之外違者重究繳遵依弔取宜興縣庫貯本道贖銀四百五十兩分發太倉州二百五十兩嘉定縣二百兩各買米給夫及示諭興工去後今該兵備按察使徐節到任接管催據太倉崑山嘉定三州縣各另申報工完緣由前來隨行水利同知王事聖覆覈去後今據本官呈稱遵依覆查得太倉州濬過顧浦河一段長一千九十四丈開面闊八丈底闊四丈五尺加深一丈吳塘河一段長六百七十五丈內除三百

丈闊深不開外實開河三百七十五丈開面闊八丈底闊四丈五尺加深一丈計該用夫四萬二千五百四十
四工五分該工銀二百四十一兩二錢七分將本道助
發贖銀二百五十兩內動支給散訖專委大使李諒贊
畫邵之桂分投督夫於本年二月初八日興工至四月
十一日工完仍存銀八兩七錢三分內支五兩該州給
另開楊林河工又支三兩七錢三分犒賞另開鹽鐵等
河管工官吳懷京等訖崑山縣濬顧浦河一段長六百

六十六丈開面闊一十丈底闊五丈深一丈計該用夫
九千九百九十工內令欠銀蕩戶浦德愈等開完河一
百四十四丈二尺二寸用夫二千一百六十三工三分
每工算銷灘價銀一分五釐該銀三十二兩四錢四分
五釐於本年二月十六日興工至三月二十日工完又
民力開完河五百二十一丈七尺八寸用夫七千八百
二十六工七分因人衆工少各塘長區民不願領銀自
開工完訖嘉定縣濬顧浦河一段長三千四百四十六

丈五尺開面闊一十丈底闊五丈深一丈計該用夫五萬一千六百九十七工五分又築壩夫三百工每工先給米一升動支原申庫貯導河夫銀二百四十兩灘椿銀一十九兩九錢八分七釐五毫買米五百一十九石九斗七升五合給夫領訖又每工找銀五釐銷算過導河夫銀二百五十九兩九錢八分七釐五毫又打壩支灘椿銀二兩五錢辦用訖又將本道助贖銀二百兩買米四百石內支米一百七十八石八斗六升四合七勺

給夫五千一百六十九名七工五分訖於二月十六日
興工至三月三十日工完又吳塘河一段長五千三百
五十七丈五尺開面闊一十丈底闊五丈計該用夫六
萬三千五百七十五工築壩夫三百工每工先給米一
升支本縣抵贖銀三十兩又支本院抵贖銀三十兩五
分罰犯金棣等河工銀一百兩灘樁銀一百五十九兩
三錢二分五釐共銀三百一十九兩三錢七分五釐買
米六百三十八石七斗五升分給各夫訖又每工找銀

五釐共銷算過導河夫銀三百一十九兩三錢七分五釐又打壩椿木支灘椿銀二兩辦用又於本道贖銀原買支存米二百二十一石一斗三升五合三勺內支米二百一十九石九斗六升九合五勺給夫六千三百五十七名五分訖於三月二十一日興工至五月初八日工完仍剩存米一石一斗六升五合八勺聽別河支用本職又經親核各開河段俱已闊深如式等因造冊併呈到道據此為照吳塘顧浦二大幹河係關太倉嘉定

崑山三州縣緊要水利湮塞年久田地拋荒今始併舉
協力疏通實為一方旱澇有備所開河段丈尺已委同
知王事聖覆核如式用過夫工錢糧又經本道覆查相
同等因具呈并造冊詳報到臣該臣會同巡撫應天右
副都御史胡執禮巡按直隸監察御史田樂覆核無異
見今造冊奏報外臣惟招復流移莫先於治田而開墾
荒田莫亟於水利今吳塘顧浦年久淤塞一旦合力疏
通在官帑既無大費在民力亦不甚勞此利既興將來

流民荒田皆可以漸而復之矣如蒙勅下該部再加查
議用過錢糧并算銷灘價導河夫銀果無虛冒並准支
銷仍行撫按官并臣督責該州縣掌印水利官員以後
凡有淤塞即便隨時設法濬治勿使復湮庶水利永興
而國賦自裕矣緣係查通水利議處荒田以甦民困以
充國賦事理未敢擅便為此具本謹題請旨

長橋灘工完疏

巡按直隸監察御史臣林謹題為蘇松水利急應開濬

懇恩處給錢糧并陳末議清查灘占田地以資工費事
臣於萬歷六年八月十五日據按察使馮叔吉呈稱前
事云云等因俱奉聖旨依擬行欽此欽遵咨行南京都
察院備行到院案行本道查照題奉欽依內事理欽遵
施行仍照本院續開款後事件一併查行去後九月二
十六日又蒙巡撫應天胡都御史案驗准工部咨備仰
本道照依咨案備奉欽依內事理轉行該府縣掌印官
將後開條款逐一查照遵行作速查議堪動錢糧呈詳

施行又蒙巡按直隸王御史案驗奉都察院勘劄准工部咨前事脩行該道會同各該掌印官從長酌議停妥具由通行各院以憑會議施行奉此卷查先該前任兵備王參政遵奉本院案驗憲牌事理備行蘇州府并吳江縣各掌印水利官各一體欽遵查照酌處工費將該縣灘占田地與侵占官河剥岸蓋房查照題復清查丈勘明白凡有應行開挑拆卸改正定立界址分定丈尺其存留徵價者分別等第徵銀在官以該縣灘價就充

該縣長橋之費餘存聽別項河工支用仍一面將應開
去處勘核土方分段計算實用工費委官募夫庠水挑
淺運土堆頓築砌石工等項計處停當以便興事又經
王參政委據吳江縣縣丞呂品勘報本縣灘田數目文
冊前來行委該府帶管水利同知劉崑覆核續據呈稱
蒙委帶領弓書算手同原勘官呂品并各該地方糧塘
圩甲人等將新舊漲灘備細查勘中間與冊相對者固
有而遺漏者尚多蓋各灘漲田地多有湖漾圍岸內太

湖龐山湖等處一望浩蕩渾無際涯職以一人之身其勢不能遍歷兼遇港小淺處所即蟻舟亦難前進但既承嚴委必須到處周視查核明悉凡開荒年月承佃久近與田土肥瘠科租等則中間有離水稍遠常年足收者有近在水旁數年間收者有全在水邊自來無收者其沮洳之地蘆葦之場有莢草叢生遞年計畝收稅不等者有全是白水僅種菱藕若欲槩依原畝起科將有以肥混瘠之弊若止憑塘長圩甲開報未免呈一漏萬

之失且田少者輸錢田多者隱匿似非公平之體畫一之法反覆思維獨有通行清丈似為得策等因到道為照江南水利脩治莫先於吳江長橋工費浩大措處甚艱本道先經行據該縣縣丞呂品勘將侵占灘田造冊到道逆知本官以一人之耳目豈能勝姦豪之欺弊行令劉同知覆勘果多開報不實誠不可不槩行清查本道已示諭該縣灘田人戶自行開報仍於各區內僉報殷實知事耆民公同塘長圩甲逐戶清量掌印官親詣

各區沿坵履畝覆核呈道調委隔屬官員覆核呈道如
有欺隱罪坐耆民塘長庶姦弊釐而工費易辦財用足
而水利可興等因具呈本院批允遵行續奉牌催徵價
備用尅日興工又行該縣先將上等灘田地價徵銀給
帖仍聽覆丈找納間隨該府新任水利同知王事聖接
管公同知縣王一言查照丈勘明實定等徵價併催查
議興工事宜去後比因兵備王叅政聽調回籍至萬歷
六年二月初三日該兵備馮按察使到任接管經理督

催間續據該縣開報示令灘田人戶納過價銀并業主
自願派方做工抵納共計已有萬兩在縣等因前來隨
蒙本院按臨吳江督催興工本道帶同水利同知王事
聖該縣知縣王一言遍歷應開去處上自吳家港至長
橋歷兩灘下至龐山湖口止一帶逐一勘驗得開濬事
宜其計方給直築壩岸水分段委官督率等項已有成
議及蕩價催縣嚴徵外又議得長橋上三忠祠橋下新
堆三高亭積土已多周圍須用石砌方免雨水坍塌之

虞應將該縣餘剩業戶定與丈尺下用木椿運石剝砌
即與銷算灘價官民兩便又議得長橋已多損壞失今
不為脩砌將來水勢衝動用力更難應行該縣即委有
心計耆民估計管工亦派餘剩業戶督令石匠脩砌保
限五年內俱無塌損准與銷算灘銀公私兩利又議得
三忠祠堆土已高而左右運土處少應於三忠祠後灣
曠處所量留一截許業戶稍遠者堆土於民情為便又
議得運河水口原數太闊於該縣風水未便應於水口

量收二十餘丈令水勢逶迤環向於該縣風水為宜且
於龐山湖水口易受等因欵呈本院蒙批據所議皆有
裨於水工一勞而可永逸者俱如議行仍給曉諭以便
遵守王同知姑令督理該縣工程稍畢即赴開江毋容
怠悞繳遵行出示曉諭官民查照定式於二月二十日
打壩興工務限一月完工督催間續據該縣申稱濬完
吳家港龐山湖二段工程於三月二十九日完脩砌長
橋一帶硤洞并二祠砌岸兩灘濬工俱於四月二十九

日工完等因呈報到道轉呈本院行委該府同知施之藩前去勘核俱各如式堅固又該本道親歷覆驗相同即令開壩通水外催據蘇州府申准本府水利同知王事聖關開濬過長橋工程原蒙查勘自太湖口吳家港起至龐山湖口止一帶原估工價題請約費銀二萬六千八百八十六兩有奇今覆丈除河心深處算減土方外實開過吳家港起沈家莊歷長橋兩灘至龐山湖口止照官丈通量長一千九百三十四丈八尺闊狹不等

積土三萬一千六百八十九方二分一釐又填壩開壩
積算土四百二十六方七分五釐共土三萬二千一百
一十五方九分六釐每方工食銀四錢該銀一萬二千
八百四十六兩三錢八分四釐內灘一千七百二十二
方運土稍遠議加工食銀六十八兩九分五釐續又募
夫收縮三高祠地基并撈淺運河夫工銀四十五兩二
錢四分共算給過開濬夫工銀一萬二千九百五十九
兩七錢一分九釐又給車水人夫工食銀五十四兩

壩竹木等項除易價完官外用銀一百八十三兩三錢
八分三釐犒賞督工員役花紅等用銀五十八兩二錢
六分五釐分段旗幟祭神等用銀三兩五錢一分二釐
築砌三高三忠二祠基岸灰石料銀四百一十八兩脩
砌長橋礮洞用過磚石灰料銀一百兩三錢五分造垂
虹亭三忠祠前石橋用石料等銀二十九兩四分脩理
龍王廟料銀九兩四錢四分五釐以上通共實用過銀
一萬三千八百一十五兩七錢一分四釐比原題省銀

一萬三千七十兩俱動支本縣徵完灘蕩地價及令應
納蕩價業戶認方開土并辦過脩砌木石等料抵作各
名下應納蕩銀訖其濬河工俱深闊築砌工俱堅固及
查刷吳江縣共收過灘蕩價并業主開土備料抵辦應
納灘蕩價銀共一萬四千二百七十三兩四錢二分四
釐於內放過前項工費之外仍剩銀二百一兩九錢七
分六釐又已變完椿木易銀四十五兩六錢一分未變
椿木竹笆該價銀二百一十兩一錢二分七釐俱聽別

項河工支用今將用過工費錢糧文冊關煩轉呈等因到府具呈到道據此隨該本道覆核相同看得太湖瀦六郡之水去吳江不能一舍自湖口入吳家港而滙於長橋達於龐山湖歸於吳淞江入海宋時環洞六十有二為橋計長百有三十丈屹若長虹吳江之素以財賦最東南者寔湖水之勝也數十年來官事因循民樂侵併日積月漲塘淤港塞致使兩灘瀰望鞠為田圃洞橋線流不能一二毋論太湖之水阻於入江即旱不得灌

溺不得泄在吳江之民亦弊甚矣今排衆議而特疏收
羣策而畢舉以吳江之餘利而濬吳江之大工於公帑
無錙銖之費以應納之蕩價而准應役之工力於民情
無纖毫之拂即今洪源巨浸浩蕩於橋門舳艫舳舻巨
絡於廛市非徒順入海之故流誠足稱東南之雄勝矣
等因到臣該臣會同總理糧儲提督軍務兼巡撫應天
等府地方都察院右副都御史胡執禮巡按直隸監察
御史胡時化看得長橋一帶水道闊者踰百丈狹者不

下二十餘丈皆洩太湖之水由龐山等湖分流入海關
於水利至大且切特其湮塞已甚僅成溝壑而開濬之
費誠煩且難又其地附依吳江縣治求之他邑既難協
濟稽之公帑復無贏餘所恃以資河工者獨灘漲塗田
耳但該縣湖蕩最廣而塗漲獨盛況多膏腴久為隱占
故臣等首疏開濬遂及於此於豪家富室不甚便也仰
荷我皇上軫念民瘼俯采末議而綸音嚴切人心震肅
臣等奉而行之不敢畏徇然後仰體我皇上愛養元元

之意每於役民之中務求恤民之法故前後委官丈勘
量出塗田荒熟不等共計六萬有餘畝就中分別徵價
以濟河工然又聽民之便願出銀者則收其貲以募夫
願出力者則計其工以准價羣情競勸諸廢俱興不但
吳家港長橋南北及龐山湖口疏通已也橋洞之久壞
者修之運河之既淺者撈之基岸之易頽者石之委該
府同知王事聖該縣知縣王一言總其事而以教諭陳
文燦縣丞萬鳳至主簿李三省陳球巡檢張楠分管之

費視原題殆省其半而功則畢舉且可永矣臣等查核無異相應題請

題濬白茆港疏

巡按直隸監察御史臣林謹題為遵勅開濬水利請給錢糧以便稽查責成事臣於萬歷六年十月內據整飭蘇松常鎮兵備湖廣按察司按察使馮叔吉呈稱本年六月初九日該臣牌開照得常熟縣白茆塘久已湮塞急行開濬行道親詣該縣相度工程如或工費浩繁并

行會議錢糧作速覆計轉報以憑題請施行此係勅書
坐名開濬事理毋得遲悞等因隨經遵行蘇州府水利
同知王事聖前去常熟督同知縣留震臣親詣白茆塘
相度工程酌議錢糧去後催據本官呈稱遵依親詣該
縣公同知縣留震臣水利主簿秦湯相喚集耆民陳如
鑑并算手人等逐一覆勘得白茆塘淤淺去處自歸家
橋小石橋起至橫塘止計四十五里量長八千七十九
丈每長一丈面闊十二丈底闊八丈深一丈二尺淺深

不等積算土方七萬七千四百三十方二分一釐九毫
每方工食銀二錢八分共銀二萬一千六百八十兩四
錢六分一釐四毫六絲分列十二段每段應搭廠一所
除沿途有菴院不必搭蓋實搭廠十所每所工料銀一
兩五錢該銀一十五兩築壩三條應用竹木工料銀二
百四兩七錢六分五釐又勘橫塘口應建石閘一座合
用木石灰鐵夫工等項該銀三千二百六十九兩五錢
一分一釐以上共該用銀二萬五千一百六十九兩七

錢三分七釐四毫六絲其肩水人夫工食候築壩興工
量水淺深用夫之多寡另行呈奪至於設處錢糧一節
據該縣申報應支白茆高明沙耿涇福山并各開地價
淘河夫銀共有二千七百二十四兩六錢八分四釐二
毫又查得崑山縣開江支存河夫銀一萬三千五十七
兩五分七釐二毫六絲四忽三微四纖一沙一塵一埃
二項共銀一萬五千七百八十一兩七錢四分一釐四
毫六絲四忽二微四纖一沙一塵一埃尚少銀九千三

百八十七兩九錢九分五釐九毫九絲五忽六微五纖
八沙八塵九埃或支各屬灘占地價導河夫銀或堪動
別項錢糧輳用并將勘定應濬丈尺土方夫工廠壩造
閘工費錢糧實用的數文冊呈乞覆議轉詳等因前來
隨該本道於九月十六日親往本塘帶同該縣掌印水
利官逐段測水相度看驗得頭段東自海口起抵閘至
橫塘口止係海潮急駛衝擊闊深及勘尾段自歸家石
橋起往西至縣通河橋止原係潮水微小上年已濬見

今深通不濬外應濬淤淺中段東自橫塘口起往西歷
芝塘直至歸家石橋止計長四十五里許核量丈尺較
算土方工費查與各官勘報數目相同無容別議為照
白茆大塘係入海正幹三吳水利之最巨者近經海都
御史勘議脩濬止踰十年而中間淤塞高者成地低者
成田何其易易如此蓋由每年導河之夫積而不用而
本塘東受大海渾潮西受尚湖昆承湖水每遇潮漲清
濁相壅渾泥遂淀日漸淤塞而兩旁業戶積尺得尺治

為田疇失今不濬不出十年塘可陸矣今茲大舉委不
可緩所據估實夫工廠壩等項工費該銀二萬五千一
百餘兩查有該縣見在各沙井各門地價等銀二千七
百二十四兩六錢八分四釐二毫崑山縣見貯支存河
工銀一萬三千五十七兩五分七釐零尚少銀九千三
百餘兩應將近該撫院奏留宗人府泝剩米折銀八千
兩徵價支用餘少查將長吳崑山等縣續完灘占地價
并該府導河夫銀通融設處俱解發常熟縣收候聽用

待十二月興工至於該縣派編耆役分管監督打壩搭
廠岸水挑淺散給錢糧等項俱候臨期另議呈奪等因
到臣看得白茆一塘自常熟縣治直通長江乃太湖東
北洩水要道非特一邑之利也故勅書內開與劉家河
等尤當分疏臣欽此欽遵即於去年親行相度見在淤
塞不通隨議開濬時因錢糧缺乏姑待開江事竣另舉
今催據兵備道按察使馮叔吉等丈過工程議過錢糧
俱頗停妥亦無容贅矣但臣查得本塘先經都御史海

瑞開濬費至四萬有餘抵今未及十年而淤塞如故雖由導河夫銀積而不用或者當時督工員役罔肯實心用事中間不無虛冒故也今據議用錢糧二萬五千有奇亦不為不多矣若不題請給發嚴行稽查責成之誠恐官仍故習工罔如式非一勞永逸之道也臣為此懼用是不憚煩瑣以瀆宸聽伏乞勅下工部再加酌議如果本塘應該開浚准將見在銀兩給發尅日興工其宗人府派剩米折銀兩行令撫臣徵解轉給完工容臣會

同撫按官稽核奏報至於勤勞官員并怠玩悞事者容臣比例據實舉劾則人心知警而事工競勸其餘開浚工費庶幾可無虛冒而利垂永久矣謹題請旨

白茆塘工完疏

巡按直隸監察御史臣林謹題為遵勅開浚水利請給錢糧以便稽查責成事據整飭蘇松常鎮兵備湖廣按察司按察使徐節呈萬歷七年正月初七日奉本院案驗並奉撫按二院案驗俱為前事該本院具題開浚常

熟縣白茆塘一帶淤淺估計夫工厰壩等項工費該銀
二萬五千一百六十九兩七錢三分七釐四毫六絲除
將見在各沙各門地價并支存河工銀一萬五千七百
八十一兩七錢四分一釐零動支外尚少銀九千三百
八十七兩九錢九分零乞勅該部查將撫院奏留宗人
府派剩米折銀八千兩徵解支用餘少將長吳崑等縣
續完灘占地價并導河夫銀通融設處一節該工部議
覆為照三吳之水莫大於太湖太湖南自吳淞江入海

北自白茆塘入海故白茆為水利緊要與吳淞江同今
吳淞江之開既已報完則白茆塘之工委應議舉其合
用錢糧則宗人府米折銀原經奏留為疏浚之費而地
價與支剩銀亦係收貯為河工之需俱應依擬動支但
本塘先經都御史海瑞開浚費至四萬有餘未及十年
而淤塞如故蓋由始開之時未盡如法既開之後不復
查理每年導河之銀徵而不用兩旁得業之戶利其速
淤是以旋開旋塞徒費錢糧而未克永賴也據御史林

題請前來今議一勞永逸之計恭候命下本部備咨南京都察院轉行御史林督同府州縣掌印水利各官查照原勘過工程議過工費尅日興工所請各沙各門地價并支存河工銀共一萬五千七百八十一兩七錢四分一釐零宗人府派剩米折銀八千兩長吳崑等縣續完灘占地價及導河夫銀俱准動支濟用仍查議本塘何故旋開旋塞開濬時作何設法方可經久開濬後作何區處方可不淤務要一勞永逸東南始終利賴其在

管工官員勤勞幹事及怠玩悞事者俱據實舉劾以示
激勸庶事可底績功可垂久而錢糧不致徒費等因聖
旨依擬行欽此欽遵移咨南京都察院備劄本院案行
本道查照該部覆奉欽依內事理即將所請白茆塘工
費通行查解常熟縣收貯明立文案聽候興工委官放
用未完者嚴行徵解務足原估銀數其覓派人夫及委
官督役通議確詳款報施行仍行府縣掌印水利官親
詣本塘沿行相度窮究知因為何開濬未及十年而淤

塞如故即今開濬設何方法方可不淤務要一勞永逸如應行加開應行阻壩及建修橋閘等項增省錢糧毋拘原議踏勘估議停妥併詳報奪一面通呈撫按詳行等因蒙此遵行間又奉撫院案驗准工部咨同前事備案行道即便照依咨案備奉欽依內事理轉行該府縣并水利等官一體欽遵查照施行又蒙按院案驗奉都察院勘劄准工部咨亦同前事備案行道查照原行勘過開濬白茆塘工程議過工費及應動銀兩遵奉欽依

事理一體欽遵動支給發仍須查議本塘何故旋開旋塞開濬時作何設法方可經久開濬後作何區處方可不淤務期一勞永逸始終利賴通候事完之日將各細數造冊送院以憑覆覈施行等因通奉到道隨該前任兵備按察使馮叔吉遵行蘇州府并該府水利同知王事聖常熟縣知縣留震臣會議得開濬本塘自歸家莊起至橫塘止計長八千七十九丈約四十五里每十一里分為一段定委常熟縣縣丞王儼主簿秦湯相吳江

縣主簿李三省吳縣主簿任可賢督工總工則同知王
事聖知縣留震臣定有身家耆民五百名分段募夫開
挑又議以二百丈立一耆民為分管每千丈立一陰醫
省祭等官為總工又議本塘照原議開面闊一十二丈
底闊八丈深一丈二尺但河形水勢不同必於取數恐
多非便且開河緊要在深不在闊如兩岸估勘不足十
二丈者聽總管官勘實順勢開導其堆土務運至十五
丈之外本塘四十五里每十里該用肩水車二百輛計

水車九百輛令塘長圖長出辦大約用車夫二千七百
人每人給米二升限六日車乾計米三百二十四石又
每五里造官廠一座管工官住劄每一里搭草廠二座
每座可容五十人為食宿避雨之所興工破土之日每
耆一名給花紅一分以為優勸又議橫塘口建石閘一
座照原估料銀三千二百六十九兩五錢一分一釐行
縣委官先行量給官銀採辦石料完備候開濬河工畢
日興工砌築等因具由列欵於萬歷七年正月十三日

通行呈詳蒙本院并撫按二院俱批准議行完日冊報
備行各官遵照間又據蘇州府知府李充實查議處置
工費錢糧數目緣由到道查得白茆塘工費題開該用
銀二萬五千一百六十九兩七錢三分七釐四毫六絲
除查有常熟縣見徵沙租地價導河銀崑山縣庫貯開
江支剩銀蘇州府及長吳二縣報完宗人府米折導河
夫灘地價銀見在共有二萬一千二十三兩八錢二分
三釐三毫尚欠銀四千一百四十五兩九錢一分四釐

一毫六絲應於見徵奏留宗人府米銀內徵給查該縣數有大戶吳潔淳名下欠者止有四百七十四兩令照銀數認方開河外實少銀三千六百七十一兩九錢一分四釐一毫六絲應將民欠宗人府米銀六千餘兩內徵給以該縣之欠米開該縣之河工官民無詞再照白茆塘為出海巨流海潮與湖水晝夜必兩會當其會處則清濁相值其流稍停渾泥遂積日復一日故易淤塞今惟於初開之時務深而不務闊既開之後每年以導

河銀雇夫撈洗然後可圖永利具由呈蒙本院批開白茆塘工費俱如議處行工完冊報繳其善後之策似亦在年年撈洗耳仍候面酌題覆又奉撫院批開白茆塘常熟縣應興水利宗人府欠銀常熟縣應納錢糧動支興工夫復何說仰行掌印官速追見在銀兩先行王同知募夫開濬賞罰撈洗事宜俱照行繳又蒙按院批開該道即行王同知留知縣將在庫銀給發興工務濬深以免淤塞可期永利完日查開應賞罰員役報奪又經

遵行間催據常熟崑山長洲吳縣并蘇州府徵完各門
地價灘稅導河夫銀宗人府米銀開江支剩銀共二萬
一千四百八十一兩四錢一分八釐四忽三微四纖一
沙一塵一埃俱發常熟縣收貯先行動支募夫厥壩之
用餘少銀兩嚴徵民欠宗人府米銀接濟去後本年三
月二十四日又蒙本院憲牌案照先該本道議將撫院
奏留宗人府米銀八千兩徵用今照本塘工程將完前
銀解到未及三分之一衆夫枵然待食該道將前未解

銀速解常熟縣收給工費支用如前銀徵解不前該道
急行區處務足原數以便完工等因行據常熟縣知縣
留震臣申稱本塘原勘長八千七十九丈該夫銀二萬
一千六百八十兩四錢六分一釐四毫六絲今該本縣
又續議增開歸家橋宕六十七丈約該夫工銀一百八
十七兩零連築壩岸水建閘共該用銀二萬五千餘兩
除各處解到本縣徵完銀支給外見今河工完及八分
尚有募夫工食犒賞供給等用約少銀二千餘兩并建

閘料銀三千二百餘兩本縣欲追原議民欠宗人府米銀支給一時徵併不前申乞區處等因到道酌議借支鎮江府嘉靖四十五年分支剩練兵銀二千三百一十兩五錢九分七釐九絲五忽六微八纖解發常熟縣接濟完工再有不敷及建閘料銀嚴行府縣追併奏留宗人府米銀湊用補還借支鎮江府銀兩具由呈蒙各院批允遵行鎮江府借支前銀解發常熟縣收用外今該按察使徐節到任接管督催各官上緊完工間又蒙本

院憲牌據蘇州府水利王同知呈報開濬白茆塘工完緣由到院已經批行本府同知施之藩推官赫瀛會同勘驗呈道詳報効勞員役及怠悞者併報去後合催本道即將開濬過工程錢糧逐一覆覈確冊呈報以憑奏繳其督工効勞員役及怠悞者分別詳奪薦獎懲治施行蒙經督催同知施之藩等著實查核冊報間又蒙憲牌行催催據同知施之藩推官赫瀛呈稱遵依會同管濬總工同知王事聖親詣白茆塘自橫塘口起至歸家

橋止濬過工程共長八千七十九丈又續議增開歸家
橋宕六十七丈每丈俱照原議開面濶一十二丈底濶
八丈中深一丈二尺旁深一丈逐一查勘濬工丈尺俱
已如式又將王同知關送用過一應募夫廠壩供給犒
賞等費及常熟縣收放過河工錢糧各數目前來覆核
得常熟縣官庫收過蘇鎮二府并崑山長洲吳縣解到
及本縣徵完河工銀共二萬三千七百九十二兩一分
五釐一毫三纖一塵一埃數內放過廠壩竹木物料除

變易還官外實用過銀一百一十六兩六錢九分三釐
又放庠水人夫食米三百六十二石一斗二升內除本
縣罰犯范壁米三十八石實該米三百二十四石一斗
二升每石價銀四錢五分該銀一百四十五兩八錢五
分四釐又該開挑人夫工食二萬一千八百四十二兩
三錢一分九釐九毫四絲內扣河深易開減銀二十六
兩二錢一釐五毫六絲外實給銀二萬一千八百一十
六兩一錢一分八釐三毫八絲又放管工員役廩給口

糧銀六十六兩七錢五分又給犒賞効勞員役花紅銀
牌與祭江開壩等用銀一百三十五兩五錢三分五釐
通共放過銀二萬二千二百六十兩九錢五分三毫八
絲逐項細核明白似無虛冒應准支銷仍有支存官庫
原借鎮江府練兵銀一千五百三十一兩六分四釐七
毫二絲三纖一塵一埃覆查相同備造文冊及查督工
効勞并怠悞員役分別勤惰填註實跡另揭開報到道
據此看得白茆塘工原題濬長八千七十九丈議開面

濶一十二丈底濶八丈中深一丈二尺旁深一丈估該夫工造閘費銀二萬五千一百六十九兩有奇續據知縣留震臣議增開挑歸家橋宕工六十七丈工費覆核減河深易開與罰犯給夫食米之外實該用開濬并建閘工銀共二萬五千五百三十兩四錢六分一釐三毫八絲今查濬過河工用過募夫厥壩犒賞供給等銀二萬二千二百六十兩九錢五分三毫八絲及查常熟縣庫收過各府縣解到并本縣徵完河工銀共計二萬三

千七百九十二兩一分五釐一毫三纖一塵一埃除放
給前項開河募夫等項支用外尚存庫貯支剩原借鎮
江府練兵銀一千五百三十一兩六分四釐七毫二絲
三纖一塵一埃既經同知施之藩推官赫瀛公同查核
開過河段丈尺濶深悉已如式該縣收支工費錢糧俱
已明白委無虛冒又該本道覆核相同應准支銷造冊
完繳其橫塘口建閘原議俟河工完畢興事查處工費
相應請詳合候通詳示日備行常熟縣將應建石閘照

依原估料銀三千二百六十九兩五錢一分一釐即委
能幹官一員選有身家者民四名管造先將該縣河工
支存在庫銀一千五百三十一兩六分零給發採辦灰
石等料完備俟水稍退限於九月中旬興工不敷料銀
嚴行府縣將原奏留宗人府米銀八千兩除徵完放過
本塘河工外尚欠五千一十四兩一錢七分七釐五毫
追完找給前項閘料并補還原借鎮江府銀共該四千
四十九兩零之外仍餘九百六十五兩一錢三分七釐

五毫與常熟縣原報應徵各沙租各門地價導河銀尚
欠一千五百二十八兩九錢六釐四毫六絲俱聽別項
河工支用再照白茆塘為出海巨流東接大海西連昆
承湖海潮與湖流晝夜必兩會會處則清濁相值其流
稍停渾泥頓積易為淤塞今河工甫完而淫潦隨至若
非白茆塘通洩則該縣水患又不知作何狀矣其善後
之計惟在年年於臘底春初水涸農隙之時令常熟縣
掌印水利官查勘淤處量動導河夫銀募夫撈洗一次

著為定規庶地方之水利可永矣今將造完核過工費
錢糧文冊并河工効勞員役另開揭帖等因呈報到臣
該臣看得白茆塘原議建閘蓋慮渾潮入淀而設此以
防之今照降水為災法宜䟽洩加此一閘恐致妨礙又
經行道查議去後今據該道呈稱行據蘇州府水利同
知王事聖呈據常熟縣知縣留震臣呈遵依公同耆民
居民衆議本塘今歲開濬不為不深而降水為災未能
盡洩者蓋因海口舊閘稍礙之故今若再建橫塘新閘

恐於內水有礙等因到道覆加詳議前閘相應停寢其
原估建閘銀兩仍貯該縣聽候別項河工支用等因具
呈到臣據此除將開濬工程用過錢糧逐一覆查明實
見今造冊奏報外該臣會同巡撫應天右副都御史胡
執禮巡按直隸監察御史田樂看得三吳之水皆匯於
太湖由吳淞江婁江黃浦白茆塘等處入海而白茆塘
入海之勢尤近且捷故今年淫雨為災而水有所洩者
此塘之利居多也用過夫工等項銀兩俱已行道覆查

委無虛冒但原議於橫塘建閘一座為拒渾潮今此塘
利於疏洩則閘可不建既經該道勘議詢謀僉同前閘
委為可已及查本塘旋開旋塞之故僉謂始開失於挑
深既開憚於撈洗邇者仰仗皇上軫念東南水利責成
臣等經理自道府以下各官罔不仰遵德意畢力以圖
之始濬亦既深矣茲欲善其後則在府縣官年年查勘
隨淤隨撈則工省而利永耳伏乞勅下該部覆議查議
將用過銀兩准其支銷未建石閘准其停止其建閘在

庫銀一千五百三十一兩六分四釐七毫二絲三纖一
塵一埃及原奏留宗人府米銀尚欠五千一十四兩一
錢七分七釐五毫并各沙各門地價導河夫銀尚欠一
千五百二十八兩九錢六釐四毫六絲嚴行府縣徵完
收貯縣庫專候別項河工支用其原借鎮江府支剩練
兵銀兩俟徵完前項拖欠銀內補還仍著為定規每年
於臘底春初之時令蘇州府水利官督同常熟縣掌印
水利官查勘淤處量動導河夫銀募夫撈洗一次並行

撫按官及臣欽遵查照施行庶已成之功不廢而東南之民永賴矣再照原奉欽依咨劄內開其在管工官員勤勞幹事及怠玩慢事者俱據實舉劾以示激勸臣復會同查得本塘開濬分管則有常熟縣縣官王儼主簿秦湯相吳江縣主簿李三省吳縣主簿任可賢各官俱能奉法効勞臣已另行分別獎賞不敢煩瀆外總管則有蘇州府水利同知王事聖任久而識見愈精才優而經畫悉當萬衆輸心用命鉅工刻日告成常熟縣知縣

留震臣廉自生威寬能得衆募夫而子來恐後給直而綜覈有方此二臣者謀始竭其心思工興殫其胼胝所謂勤勞幹事相應優敘者也仍乞勅下該部議覆如果臣言不謬將王事聖留震臣均行紀錄則所以激勸於將來者益遠矣緣係遵勅開濬水利請給錢糧以便稽查責成事理未敢擅便為此具本謹題請旨

災傷蠲賑疏

巡按直隸監察御史臣林題為地方異常水患懇乞天

恩亟行賑蠲以安人心以固邦本事臣待罪水利竊見震澤一湖連跨數郡北受應天溧陽鎮江丹陽荆溪百瀆之水南則宣歙廣德天目杭湖之水注焉而出海之道僅有劉河黃浦二流如舊若吳淞江若白茆塘則皆堙塞矣稍遇淋雨湖水輒漲即增尺許經月不消而吳崑等縣又在太湖下流田地低窪率皆淹沒是以惓惓請開吳淞江請濬白茆塘正慮其滯之無所洩也臣於今年四月內為白茆工竣移巡松江吳江等處據各鄉

民備稱本月連日大雨湖流驟溢田疇被浸幸三四日
內水即稍洩不妨栽種臣竊自慶以為諸所濬治或可
裨於民生萬一矣詎意五月以來自江而南無郡無縣
無日不雨遂成異常之災乎臣於六月初二日據蘇州
府同知王事聖揭稱今歲淫雨連月不開江湖之水漲
溢殊甚及查吳江長橋下水則今歲之水與正德五年
相同向使吳淞白茆未經聞濬又不知作何狀又續據
常州府知府穆煒揭稱本府東倉運河開挑工甫七分

偶值靈雨連旬裁揀事忙不得不暫為停止即今水勢
浩蕩城北田土溢為巨浸而府城及各橋梁傾倒數多
民間荒涼愁苦所幸本府舜河等河大通而下江吳淞
白茆塘等處洩水頗利數日之內民情稍安又初九日
據蘇州府知府李充實呈據太倉吳江等州縣地方三
月四月陰雨連綿晴霽不過五六日即今五月何期靈
雨傾盆連旬不止城垣廬舍公廨民房塌倒無數其各
處河道雖經開濬因積雨日久海水泛漲諸流不納一

時不能宣洩田地無不淹沒萬姓皇皇悲號滿路據各
所稱則常州諸邑似尚可緩若蘇州所屬或難為力矣
臣不勝悲惻不勝咎責自恨疏導之方未能盡講開濬
之力未能博施雖天時之降災亦臣失職之所致隨行
蘇松督糧道勘議及示諭各守圩岸盡力車戽去後復
據吳江崑山二縣居民赴稱各鄉姦惡乘機聚衆假以
借米為名肆行搶奪致有殺傷當經撫院曉諭懲其首
惡許以賑恤各稍安息等情臣聞之復不勝驚懼竊惟

水旱之災何世無之未聞民情遽爾洶洶若此推原其故蓋蘇松等郡舊歲禾被蟲傷倉箱已匱今春麥為雪害庾廩益空當此插蒔之時復遭異常之雨已種者苗未舒而被淹未蒔者時已過而難再朝夕既不能保徵科又無所出貧窘所迫遂無聊賴故姦頑桀驁者奮臂而前蠢愚寡弱者和聲而往方今被災之始一旦景象若此計距來歲之秋尚有經年之久是不大可隱憂乎臣聞之嘉靖三十三年及四十年間蘇松水災俱經巡

撫衙門題將帶徵錢糧盡數停止見年者不分起存本
折照依災數蠲免仍動支許墅關鈔銀應天等府事例
銀賑濟是以當時雖有水滂之災而無潢池之警今水
災如此人心如此所恃者皇上如天之仁賑其飢蠲其
稅耳蓋不早議賑則目今之荒民何所賴以為生不早
議蠲則將來之荒田何所出以成賦是救荒之策無出
於此而賑飢一節尤不可一日緩者何也蠲免之恩必
待勘明分數而後行若賑恤之舉則固可便宜而行事

者也。以臣愚見為今之計，莫若先行賑飢，隨議蠲免。臣嘗查得蘇州府見貯在庫，可以借用銀兩，如黃白絹銀七千兩、還官銀一千六百九十兩、宗人府改解河工扛銀六十兩。隆慶六年以前，馬價銀六百餘兩，黃蠟等料扛銀四十八兩。該府贖銀五百兩之類，計亦不下萬餘。即一郡而他郡可知矣。伏望皇上軫念東南重地，勅下戶部從長計議，亟行撫按官將各郡縣庫藏如前項堪借銀兩，或照先年動支鈔關及各府事例銀兩作速支

給設法平糴以救飢殍之命一面行勘各郡縣被災分
數將萬歷五年以前帶徵錢糧暫行停徵其七年起存
錢糧出格蠲免兌軍錢糧或於臨德等倉抵運或於將
來歲豐帶徵仍乞勅行撫按官使乘會計未定之時張
掛榜文俾民通曉皇上德意庶幾窮民得賑而生得蠲
而安自不至於妄動而竊發矣夫公帑所貯與夫常賦
所供要皆惟正之額臣非不知不可以輕議也但時勢
至此亦有不得不然者故緩一時之征所以培萬年之

邦本渙一時之積所以安億兆之人心伏願皇上留神
省覽則東南之民幸甚臣不勝悚懼懇祈之至謹題請
旨

災傷覆覈疏

巡按直隸監察御史臣林謹題為水害甚急河工可慮
乞勅當事諸臣加意修守以保萬全事臣於萬歷七年
八月內奉南京都察院劄付准工部咨該工科都給事
中王等題稱南直隸地方霖雨不止江水暴溢蘇松等

府淹沒民田無數各項河工相應加意脩守隨該本部
議覆蘇松水利昨專遣憲臣開濬陂塘以備水勞漸次
報完似有成績今遇霖雨決洶水勢漫溢民田蕩然合行
撫按早為查處恭候命下本部咨行應天巡撫都御史
胡執禮及咨都察院轉行巡按御史田樂仍咨南京都
察院轉行水利御史林查審計處具奏等因覆奉聖旨
是欽此欽遵移咨前來脩劄到臣隨經案行蘇松常鎮
兵備道查照題覆欽依內事理會同各府掌印水利等

官親行踏勘廣詢轉訪務須從公查驗據實登報要見
某縣被災低田有無盡淹高田有無復種的係何項江
浦疏通救援作速具由通詳以憑具奏去後今據按察
使徐用檢呈稱行據蘇州府申該知府李充實公同水
利同知王事聖勘得所屬太倉州開濬過七浦吳塘顧
浦楊林鹽鐵等河俱深通流兩旁田地得以灌溉今歲
靈雨潮水泛漲賴洩無阻又勘長洲縣境內河港俱各
疏通利益但查官塘自閘門楓橋起至滸墅鈔關止葑

門減渡橋起至吳江界止婁門李王廟起至陸涇壩崑
山界止齊門下牽埠頭起至常熟界止一帶往來要路
近被雨水衝決土岸斷水各數百餘丈不等雖工程浩
繁速宜酌處修築又勘吳縣各區枝幹河港先奉明文
開濬深通河岸候收割之後責令傍田業戶修築又勘
吳江縣田禾有游青一二申報八月中旬禾當吐秀更
被狂風驟雨前此游青又俱淹浸殊可矜憫詢諸輿論
咸謂今年水患比之嘉靖四十年雖尤加倍然四十年

之水北門城內盡是行舟今年之水幸開吳家港長橋
龐山等湖通流無阻即今低下之田一時雖不堪布種
稍俟水退百姓竭力修補蒔種菜麥可望春花小熟民
可聊生地方得賴又勘得常熟縣白茆大幹方濬成績
隨遇靈雨而三吳巨河之水皆從此瀉即水路無幾而
入海甚便是以民田雖至驟浸地方田廬猶不致泛濫
衝決者白茆之利賴為多而許浦等三河亦與有裨又
勘崑山縣新開吳淞江顧浦二河原濬治深闊雖遇洪

水而沿江諸浦各河港田疇之水咸賴藉以翕受會歸
於海並無漫溢衝決又勘嘉定縣境內濬過浦涇塘浜
澀等河十八處皆臨鄉村大幹枝河今堪灌溉蓄洩利
益於民又開濠河四處係城池內外要河今賴防慎火
盜又疏南翔市河六處皆臨鎮要大河道舟楫商賈日
盛又令業戶開過張家浜十八處田間腹裏溝洫車戽
洩瀉又開過吳淞江一條境雖屬於崑山惠實流於兩
郡又開顧浦一條以上二處臨十六十七十九荒區今

民多復業田可開耕另有江東護塘一條沿海極邊衝
決不測議就地塘長脩築完固自遭水患之後古岸道
路皆多潰崩奉文分投諭令槩縣併力修填據民悉稱
田內見有補種未曾收割等因又據松江府申該知府
閻邦寧同水利通判蔣守成親歷華上青三縣各區廣
詢輿論勘得府屬河流東接海潮從黃浦逆上引入渾
沙成淤自來高鄉以旱為憂低鄉惟澇是患近蒙興脩
水利緊要江浦俱開濬工完各區圩岸次第修築旱澇

有備大獲利賴不意今年霪雨經旬洪水暴漲各處民田被滄士民相訝此二十年未有之變所幸出於河工報成之後尚當秧苗將移之初如東南高鄉因吳淞江開通洩水自急泖湖水分引北行西水雖來其勢已殺在秀州塘官紹塘蒲匯塘等河各因開濬水面廣濶塘岸高固蒲匯塘新港口又築有新壩外關黃浦之水不得入內因是民田水淹較少民得車水插秧至秋小收西北低鄉淹沒雖多本由潮勢阻逆不得急洩亦幸吳

松江疏通水由新開大小山涇諸枝河分洩而下江流
一平水勢亦退民間併力車戽猶得移苗雖布種過時
收穫數少人謂較之嘉靖四十年水災久渰無收已為
滿望等因又據常州府申該知府穆煒親督屬縣掌印
水利官踏勘得武進縣西北高鄉江潮不及每年遇雨
憂勞遇亢憂旱自孟瀆河既開太平舜河重濬則水
有蓄洩今歲靈雨彌月即高田亦皆淹沒未幾水退棟
時漸滿與夫累年不熟之鄉且至大收此孟瀆諸河開

濬之功也在東北東南俱地勢卑下常年以澇為憂今
歲淹沒十居八九未幾補蒔成熟者亦不下十之五六
此孟瀆河上流水瀉而入於大江白鶴等河既濬勢分
入於諸湖故不至於大渰沒者亦其疏治之功也但豐
北豐南政成等鄉舊為芙蓉湖其地極低係屬武無兩
縣分築圩岸不甚高厚致被洪水衝決至今渰沒已經
議處修築另詳又勘無錫縣東南鄉地勢本高雖有河
渠不通各港若遇水澇不能流洩田畝數遭渰沒已照

治田款議將察亭廟蕩等十處河道疏導接流塘南錢
橋轉水等河以致通洩得宜今年雖遭大水得種成熟
全無淹沒其西北低鄉有金城等處四壩外抵張涇內
臨河港常遭衝決淹沒已經修築高厚內有甘家閘通
達張涇大河各壩內河皆賴流洩入江以致低鄉亦無
全沒其青城興道低鄉切近芙蓉湖灘極低窪處見今
勘議夫工修築另詳又勘宜興縣東北往南一帶高鄉
傍湖口百瀆諸港濬洩得以全熟其西一帶低田坐連

西汎濁湖地勢窪濕歲年水淹無收近鑿西汎裏河疏濬烏嘴亭山等瀆河十四條今年洪水淹沒旋即下流瀉洩禾稻全活賴有薄收又勘江陰縣乃濱江之地圩蕩易沒民田十居四五通疏河道一日二汎江潮往來渾沙易塞高下田畝皆賴引流放洩奉文竭力修治開過舜河青陽山塘九里大幹四處寒塘等支河七十餘條築過寒塘等圩一十餘處自此修治之後已足預備旱澇適遭洪水江潮倍漲高下田地盡沒所幸各河疏

通雨止潮落高田皆得插時低田亦賴岸塍堅固溝洫
流通庫水漸次復種約之十有三四即今頗獲秋成又
勘靖江縣孤懸江中周遭通潮港汊六十四條疏濬通
流圩岸六十四處堅築高厚雖遭靈雨江潮洶漲然圩
隄堅固河港通洩復種田禾雖不能全熟而內地田禾
得賴有收若非疏治水勢速退何有今日等因各另具
申到道為照江南惟水利為急蘓松地卑勢如仰盂吳
江逼臨震澤受天目杭歙宣溧諸水來源一由長橋夾

浦吳淞江入海又經南泖泖秀州塘歷黃浦入海一由
婁江歷劉家河入海一由崑山巴城等湖歷白茆塘入
海然吳淞江白茆塘秀州塘未開之時一遇水滯在吳
淞崑山常熟等諸邑之間內水不能宣洩遂致拋荒今
年雖遇賊水為災海潮外漲所賴三巨幹河開後水歸
正道入海兼濬諸幹枝河通貫河流洩瀉利賴是以高
田皆得遍插成熟低田漸次補蒔亦得薄收詢諸士庶
咸謂今年水患比四十年尤甚而少得收成者實疏導

之功可驗也再照長洲縣應修閘門埠頭起許墅關止
封門至吳江界止婁門至崑山界止齊門至常熟界止
四路官塘多為雨水衝決土岸斷水去處各有數百丈
不等一則民病於涉二則田被淹沒及今不為修築明
歲水發加工尤難合行各縣處脩樁木量給食米助夫
修築其嘉定縣坍塌護塘與夫武進無錫二縣應築芙
蓉湖隄及各州縣應濬各區河圩岝塍俱要趁此水涸
農隙之際分別難易派集夫力量處食米亦令乘時益

舉修築以備旱澇相應請詳等因到臣會同巡撫應天
右副都御史胡執禮巡按直隸監察御史田樂議照三
吳水利湮廢已久自萬歷五年始命臣專理其事而撫
按會處錢糧次第興工在蘇州則七浦吳塘顧浦楊林
鹽鐵吳家港長橋龐山白茆吳淞江諸處在松江則秀
州塘官紹塘蒲匯塘新港口諸處在常州府則孟瀆河
太平舜河白鶴察亭廟蕩西沅裏河烏嘴亭山河諸處
迴環千餘里而工程如此一時人力亦云曲盡矣第今

靈雨異常江海俱溢河身幾何豈能疏洩故蘇松二府
仍稱水災天時使然非人力之咎也然截長補短秋收
二三分則皆開濬之效至於常州一府武進無錫宜興
田俱成熟江陰靖江災傷不多尤灼然顯著者今水勢
平落甚者仍舊間有衝塌水利官隨便修築外惟常州
縣自閭門埠頭起至許墅關止葑門至吳江界止婁門
至崑山界止齊門至常熟界止嘉定縣坍塌護塘武進
無錫二縣芙蓉湖隄及各河圩岸諸處俱屬未議工程

委應及時修濬既經兵備按察使徐用檢查勘詳明相應題請伏乞勅下該部再加查議合無仍行撫按募處人夫錢糧聽臣將常州等縣閭閻埤頭芙蓉湖等處督率府州縣掌印水利官大加修濬以濟目前以期永利工完之日造冊奏報緣係水害甚急河工可慮乞勅當事諸臣加意修宇以保萬全事理謹題請旨

題水災議蠲賑疏

巡按直隸監察御史臣林謹題為水患重困懇乞聖恩

俯從寬恤以安地方事臣於本年四月內巡至蘇松等處勘核河工不意閏四月二十五日以來天雨傾盆連旬不止江潮湧漲道路悉淹暫回南京雷風倍作京城內外街衢隄岸率多漂溺水勢不退隨於五月十一日牌行按屬蘇松常鎮四府水利官查勘各屬田地有無被災分數具由報奪去後本月二十日據上元縣申稱閏四月以來天雨連旬洪潮盈丈本縣鳳城長寧等一十八鄉圩岸盡衝房舍悉塌二麥已無收成禾苗又被

淹爛戀土之民束手待斃零丁之戶逃外苟存目擊時艱委難坐視二十一日據常州府呈稱本府所屬地方四月終旬以及今日靈雨如注水勢泛漲城北抵江陰一望無際而宜興無錫濱湖諸區連天巨浸麥盡朽腐秧盡損壞秋成失計勢已不支六月初五日據鎮江府呈稱勘得丹徒丹陽二縣即今水漸消涸尚可補栽紅稻通計被災不過二三分不敢濫希蠲賑惟金壇縣地居卑下邊臨長蕩等湖一遇驟雨極易漫淹今田廬俱

沒里甲逃亡若非破格蠲恤則該縣積瘵之民其何以
瘳本月十一日據揚州府江都縣申稱閏四月以來靈
雨連綿二麥浸爛田禾淹損東自張注溝以至艾陵湖
等處西自甘泉山以迄大儀北自八塔鋪直至露筋南
自楊子橋以抵瓜州地勢雖有遠近被災俱各相同十
三日據蘇州府呈稱勘得各州縣今歲水勢比之上年
實長五寸其間地勢稍高圩岸完固者俱已車救至如
常熟縣則一望成湖較之別縣似為尤甚二十一日據

松江府呈稱除上海縣地勢高阜水道疏通督令車
救幸無災害外華亭縣西北南鄉青浦縣四十二三
等保近傍澱泖黃浦囊腹處所水深不能出洩車救
難以施工間有半存終不結實大約二縣災傷華亭
十之三四青浦十之四五等因各申呈到臣又續據
各府水利官奉臣牌查水患回由與各府呈報相同
臣將各呈批行蘇松常鎮兵備道并各該府縣覆勘
尚未詳報臣自念待罪蘇松等處水利四年於茲矣

濬治之工罔不殫其心力復因去年霍潦之後臣益多方咨訪增濬浦塘加築圩岸凡以為捍洩備也自期非有大蓄歲保用登矣不揣今年復遭此患雖據各屬報災不過數縣其餘尚多車救無恙而臣之奉職無狀其敢以自諉也臣於去年曾以災請仰荷皇上軫念東南重地垂察狂瞽微言特下綸音禁亂民議蠲賑江南赤子遂得以保全至今臣敢復有所冒昧陳乞哉竊惟堯有九年之水湯有七年之

旱而民不思亂者恃有聖人在上為之扶植而全安之也蘇松諸郡連年歲祲方今被災之民咸盡力於車戽補時之務而弗敢有亂萌者亦恃我皇上聖恩浩蕩加惠窮民而明旨森然在人耳目也知有嚴禁故相率以守朝廷之法思有曠恩故相安以待有司之請耳苟臣不以轉聞于上則是下有窮民而情不上達上有聖主而澤不下究有臣如此將焉用之臣是以不避煩瑣復有所瀆議者有曰今歲之災尚不

至如往歲之甚且分數未經勘報烏得以輕疏為也
臣以為不然譬之人也有元氣尚壯而驟冒風寒者
病勢雖危藥之尚易至如久病者精氣已竭方在呻
吟而風寒復有以傷之即倉扁亦望而驚矣往歲之
災驟病之證也今歲之災久病之證也故今歲之一
分抵往歲之數分今歲之數分抵往歲之十分使不
亟為之所萬一秋期已過蠲格不下事勢轉迫致有他
虞咎將誰之諉耶若夫上元乃京邑根本江都為

南北咽喉被災獨重所當一體寬恤者也除災傷分數
容各撫按官勘實另奏臣謹以被災緣由先行具報并
將蠲賑二事叅之輿論酌之時勢補偏救敝列款以請
伏乞勅下該部議覆如果臣言不謬亟賜施行則東南
之民幸甚臣愚幸甚緣係水患重困懇乞聖恩俯從寬
恤以安地方事理為此具本專差舍人完和齎捧謹題
請旨

計開

一議蠲以救窮民臣惟今年各屬被水雖不稱
為全災然其中有被災特甚者據一郡則如
蘇之常熟常之江宜鎮之金壇是也據一邑
則如吳江之二十八等都長洲之十二等都
華青之近於泖澱黃浦等保是也上元江都
類皆如此夫一邑災甚則一邑之錢糧無所
出矣一區災甚則一區之錢糧無所出矣向
隅之泣誠為可憫往歲雖有蠲免率諸邑而

均攤之是以恩有所分而全荒之區每畝尚
徵銀一錢六分以上夫熟田得蠲數分不足
為惠而荒田即欲納一二分且無所辦矣况
不止於是乎為今之計宜行各撫按嚴責所
司據實定蠲田果全荒即與全免半災者量
行改折無災者照舊徵收至於災輕縣分不
得比例攤平敢有捏熟作荒者里排重治而
官吏以不職黜庶熟不至於倖免而荒區之

民得受全惠將來免於追呼籌楚之苦此固
無私之仁至公之法也伏乞聖裁

一議賑以收實効臣惟江南雨水多發於插蒔
之時而秧苗未長易為淹沒故雖有河以洩
水亦必有圩以捍水臣於去年以來加意築
圩除各縣盡責之民力外即如武進無錫之
芙蓉湖圩崑山縣之西北等圩一則工程浩
大民心弗齊一則村落困窮民力弗足隨准

該府縣之議量以備賑米穀濟之小民相勸
於工而各區之田舊歲被淹者今皆得圩以
救秋成可望此其明驗也往歲蘇松之屬破
格議賑不下二三萬金矣給散之時小民未
必親領侵冒者固不能無至於鑿封之間吏
書匠役抵換欺匿無所不至臣偶巡歷崑山
曾究其人寘之於法蓋官有所散而無以稽
其實故也先時曾有議及於此者以非原題

之意遂寢為今之計宜行撫按查處堪賑銀
米嚴督有司踏勘極低田地賑此荒民築此
荒圩即使中有侵冒之弊則固有圩岸之工
可以考其虛與實也此民有所濟以為生官
有所藉以興利其視徒有賑濟而無實効者
大不侔矣伏乞聖裁

題濬三丈浦

巡按直隸監察御史臣林謹題為開濬水利請旨處給

錢糧以資工費事據兵備按察使徐節呈稱萬歷七年八月內蒙本院查得蘇州府常熟縣三丈浦久已淤淺合行勘濬牌行本道即將前浦沿行踏勘淤淺去處逐一丈量筭計土方議派人夫酌處工費刻日興工如或工費重大亦便議處停妥通詳請發依蒙行據蘇州府水利同知王事聖呈稱親詣該縣會同知縣留震臣到於三丈浦勘係幹河北通江海南接尚湖諸水該區田地高阜全賴茲河灌溉比因開濬年久見今淤淺幾成

平陸委應亟濬逐一丈量自海口倒馬橋起至讓塘橋止共量長官丈四千一百四十丈應開面濶七丈底濶四丈連水開深一丈二尺為則共積見土二萬九千四十方二分五釐每方用夫一十六工共該夫二十二萬五千四百四十四工每夫工銀二分該銀五千七百八兩八錢八分又築壩三條該銀二十八兩搭蓋官廠四座該銀十兩庠水人夫飯米一百六十石該銀八十兩通該共銀五千八百二十六兩八錢八分隨行該縣查

議堪動錢糧續據申稱此河嘉靖二十八年間曾用闔
縣民力開濬但工費浩大今歲又直洪水為災百姓困
窮力果不堪當為官濬且本縣帑藏匱乏查無堪動錢
糧止有庫貯開濬白茆塘放存河工銀一千五百三十
一兩六分四釐七毫二絲白茆灘稅銀二百六十三兩
七錢二分九釐五毫并各衙門入官導河賦例等銀五
十六兩九錢三分三釐八毫通共有銀一千八百五十
一兩七錢二分八釐二絲堪以動支尚少銀三千九百

七十五兩一錢五分一釐九毫八絲相應申請官銀募夫興工且於疏濬救賑亦為一舉兩利據此看得三丈浦委係東北入海要道匪但資一邑灌溉之利而已所當亟為脩濬但今值水荒似難重困合議官銀以資工費今據水利同知王事聖勘議前來止查有該縣官庫見貯白茆河工支存并灘稅等銀堪以支用尚少銀兩相應請詳查議府縣官倉米穀及應賑濟銀兩呈發等因到臣該臣看得前浦內以洩尚湖諸水入海而該區

高阜田地皆藉之以為灌溉關係固至要也乃自嘉靖二十八年開濬到今淤塞將成平陸委應及時開濬且值年荒募夫開挑兼寓賑恤誠一舉而兩利俱存但據議工費頗繁該用銀五千八百二十六兩有奇而該縣庫貯僅銀一千八百五十餘兩尚少銀三千九百七十餘兩雖據該道呈稱查議府縣官倉米穀及應賑濟銀兩然猶未有定說也若不具題請給萬一有所推諉則工從中輟矣合無乞勅工部查議如果前浦應開准行

常熟縣庫貯見在銀兩先行給發刻日興工不敷銀兩
咨行撫按官多方設處務求共濟至於興工一應事宜
容臣督責該府水利同知王事聖該縣知縣留震臣選
委能幹員役募夫如法開挑完日查明造冊奏報倘有
怠玩仍行叅治如此則事有責成工無墮悞而所裨於
地方者亦多矣謹題請旨

三丈浦工完疏

巡按直隸監察御史臣林謹題為開濬水利請旨處給

錢糧以資工費事查該臣勘得蘇州府常熟縣三丈
浦年久淤淺相應開濬議該夫工銀五千八百二十六
兩八錢八分該縣止有見貯白茆塘放存河工等銀一
千八百五十一兩七錢二分八釐二絲尚少銀三千九
百七十五兩一錢五分一釐九毫八絲工費頗煩於萬
歷八年正月二十八日具本題請處給一面牌行蘇松
常鎮兵備道督該府縣掌印水利各官查處工費刻日
興工間本年閏四月二十一日奉南京都察院劄付准

工部咨該臣題前事該本部覆奉欽依移咨本院備劄到臣隨經案行該道轉行各官一體欽遵去後今據該道呈稱蒙本院案驗前事備案行道即便查照該部題奉欽依內事理欽遵速將開濬過工費數目查明造冊送院以憑奏報施行又奉撫院案驗准工部咨同前事備案仰道照依咨案備奉欽依內事理欽遵查照施行又奉按院案驗奉都察院勘劄前事備案行道即將三丈浦河工逐一遵奉議處施行工完冊報等因依蒙備

行蘇州府并常熟縣各掌印官及水利同知王事聖將
三丈浦應濬丈尺土方工費廠壩夫工等項錢糧覆核
的確刻期興工隨據該縣申稱原估該工費銀五千八
百二十六兩八錢八分數除先有在庫白茆塘放存河
工白茆灘稅各衙門入官導河贓例等銀共一千八百
五十一兩七錢二分八釐二絲聽用尚少銀三千九百
七十五兩一錢五分一釐九毫八絲相應多方處備興
工查得本縣庫貯萬歷七年分省存役銀六百五十兩

又萬歷八年分導河夫銀五百兩本縣萬歷八年分牌坊銀七百兩本縣灘田地價銀三十四兩二錢三分三釐又撫院罰犯邵鑑河工銀三十兩三錢九分本府發縣各項導河灘田銀五百六十三兩四錢八分四釐六絲一忽三微五纖兵備道項下贖銀一千四十八兩六錢六分七釐九毫三絲八忽六微五纖連前通共有銀五千三百七十八兩五錢三釐二絲其餘不足在於府縣倉貯備賑米穀內找給緣由前來呈允准給去後

續據同知王事聖知縣留震臣呈開原題開濬本浦通
長四千一百四十丈估該工費廠壩銀五千八百二十
六兩八錢八分今該覆量通長與原勘丈尺相同分為
四段開挑一段二段計長二千八百八十七丈五尺俱
開面濶七丈底濶四丈除水深四尺外實開深八尺三
段四段計長一千二百五十二丈五尺俱開面濶七丈
底濶四丈除水深四尺五寸實開深七尺五寸共該夫
工銀五千七百八兩八錢八分已給過銀五千二百六

十八兩三錢三分九釐二絲尚欠給銀四百四十兩五錢四分九毫八絲又增濬月形河宕八丈給工銀一十兩四錢九分六釐廠壩竹木等項除給還原物鋪戶收領外實止用銀一十兩四錢八分一釐岸水人夫用過飯米一百四十石五斗四升價銀七十兩二錢七分管工縣丞王儼義民五百長周熙等供給犒賞并開壩工銀共一十七兩二分紙劄祭神等項銀一兩八錢九分七釐通共實用銀五千八百一十九兩四分四釐該職

等督同縣丞王儼同分工各役率夫於二月十二日截
壩興工至三月二十五日如式工完訖已將原報續處
前項見在庫銀五千三百七十八兩五錢三釐二絲盡
給支用外尚少未給夫工銀四百四十兩五錢四分九
毫八絲原議於府縣倉貯米穀數內支給今查米穀係
備賑錢糧已奉撫院放賑災民訖前少夫銀應議另處
找給見存木九十七根合變原價銀三兩二錢一分一
釐還官等因前來隨委吳江縣知縣王一言覆核去後

今據申開遵依親詣工所逐一查核開過河段長廣面
底濶深丈尺俱如式相同收放錢糧並無虛冒備細造
冊并將効勞員役開揭呈奪等因到道據此為照三丈
浦係東南入海要道匪但資一邑水利茲因淤塞年久
幾成平陸今已開通宣泄利賴共計實用工費銀五千
八百一十九兩四分四釐比原題減省銀七兩八錢三
分六釐已將先報庫銀并續處官銀五千三百七十八
兩五錢三釐二絲儘給外尚少欠給夫工銀四百四十

兩五錢四分九毫八絲原議將府縣倉貯米穀內動支
今米穀已放災民用訖似應另議處給相應請詳合候
通詳九日備行該府縣查照將前用過錢糧准作支銷
見存木九十七根合變原價銀三兩二錢一分一釐還
官其欠給夫工銀四百四十兩有奇合於本縣見徵萬
歷九年分導河夫銀五百兩內照數動支找給各夫收
領等因造冊并將効勞員役另揭開呈到臣臣隨會同
巡撫應天右僉都御史孫光祐巡按直隸監察御史田

樂覆核無異造冊間又奉南京都察院劄付為水患重困懇乞聖恩俯從寬恤以安地方事該臣題該工部覆奉欽依內開各工已濬完者要見緣何宣洩未速急為區處等因備劄到臣奉此除通行各府州縣一槩查理外隨經備行兵備道速行查勘新濬三丈浦河道中間宣洩有無阻滯應否增濬要見本浦一開有無實効勘議明實作速具由呈報以憑奏繳去後今據該道新任副使李頤呈稱依蒙行據蘇州府水利同知王事聖呈

開遵依行據常熟縣申稱隨該知縣梁宜生督同水利主簿章化前詣本河集各管工官陳敬思等逐一查勘得自謝洪浜起至戈家灣止本年開濬如式見今深通宣洩並無阻滯其戈家灣起至海口止未曾開挑用竿探水俱深八九尺餘亦通達不必增濬兩旁田畝開後俱係成熟亦無淹沒之患等因到職據恐不的隨該本職親詣該縣公同梁知縣章主簿到於三丈浦地方逐一覆勘相同等因到道據此為照三丈浦乃入海大幹

已經議處工費開濬工完濶深如式隨該前道徐按察使覆實冊報無容別議今據王同知梁知縣親勘本浦自開濬之後潮汐往來並無阻滯兩旁田地均獲灌漑今夏雖遇洪水為災而地方得免淹沒之患疏治信有成功矣等因前來臣惟三丈浦乃入海要道淤塞年久今幸開通節經覆勘宣洩並無阻滯兩旁田地得以灌漑成熟今歲洪水為災而該地田亦免淹沒之患此該道與府縣水利等官身親勘驗別無異議及查工費計

該用銀五千八百一十九兩四分四釐已給過銀五千三百七十八兩五錢三釐二絲尚欠未給銀四百四十兩五錢四分九毫八絲議於常熟縣見徵萬歷九年分導河夫銀五百兩內動支找給見今造冊奏報如蒙勅下該部查議前項工費果無虛冒已給者准其支銷未給者聽候找給仍行撫按官并臣督責該府縣掌印水利官以後凡有淤塞即便隨時設法濬治勿使復湮如此則水利可永而地方有攸賴矣緣係開濬水利請旨

處給錢糧以資工費事理未敢擅便為此具本謹題請
旨

題濬大瓦浦橫塘橫泖等處疏

巡按直隸監察御史臣林謹題為查濬蘇松二郡支河
懇恩處給錢糧以全水利事據兵備按察使徐節呈稱
萬歷七年六月內蒙本院看得蘇松二府地方水患固
因天雨連綿海潮泛漲間有屬縣一二地方水淹日久
不能即速消洩恐係下流河道必有阻滯未盡開濬者

牌行本道督委府縣水利掌印官親詣踏勘要見某處
淤阻當開查勘的確丈議土方工費詳報依蒙行據蘇
州府水利同知王事聖勘稱常熟縣三丈浦係東北入
海要道非但資一邑水利亟宜開濬已經會同該縣知
縣留震臣丈勘土方計算工費另由詳報外及勘崑山
縣澱山湖口起至小千墩浦口止一段又夏駕河一條
俱淤淺應濬太倉州該開青魚涇一條其大瓦浦一條
工力最鉅屬太倉崑山嘉定青浦四州縣地方工當並

舉以上各河係通江入海要道所當亟濬洩瀉利賴共計估該夫工銀二萬二千九百八十九兩有奇議得濬山湖工應該官濬夏駕浦青魚涇太瓦浦三河當官濬七分民力三分合行該州縣設處錢糧開濬等因又據松江府水利通判蔣守成勘稱應濬華亭縣南橫涇蟠龍塘南橋塘通波塘上海縣竹岡河青浦縣橫泖蟠龍塘橫塘皆係江海咽喉吞吐要道所當疏濬共估該用夫工銀一萬五千五百七十二兩有奇查無堪動錢糧

若責民力則先濬秀州等塘照田編夫民已不堪況當
地方災傷之後勢不可再乞為轉達設處開濬等因各
將應開河段丈尺土方夫工銀數開報前來本道看得
三丈浦入海巨幹實關緊要水利另由詳報外其餘應
濬澱山湖口夏駕大瓦浦與夫松江府所屬橫瀝蟠龍
塘南橋塘通波塘竹岡橫塘橫泖諸河皆係接江連海
引流通洩至緊水利悉當乘時興事但稱錢糧匱乏地
方災傷難責民力所當酌處等因到臣該臣看得蘇松

諸郡古稱澤國而幹河支港不啻千百大則洩水以入
海次則通湖以達江小則引流以灌田所利於民生國
計至切也年久淤淺蓄洩無裨一遇水溢固有救援邇
荷我皇上軫念東南為財賦重地命臣督理其事三年
於茲矣臣雖智術短淺然不敢不竭其愚故凡有興作
備極咨訪工難並興則別緩急以漸舉費難卒辦則酌
盈縮以曲圖民力有可致者致之官帑有可動者動之
皆不敢輕易一一煩瀆宸聽至於工煩費鉅民無所出


官無所助不得已然後冒昧陳乞於君父之前也今幸水利之大者如蘇郡之長橋吳淞江白茆塘吳塘顧浦七浦塘等處松郡之秀州塘蒲匯塘官紹塘三汊河等處常鎮二郡之孟瀆河舜河青陽港白鶴溪西沱等處皆幹河也俱經設處興工竣事他若田間溝洫圩岸該民自行濬築者臣設為治田六事責成於民則亦次第令民起夫陸續具報完工共開濬過大小江浦港涇一千一百餘處修築過圩岸橋閘二百一十餘處矣舊年

洪水泛溢宣洩頗利民間尚有半秋雖明效之可睹如此然臣方懼無以稱任使將俛首以待罪譴也乃以人之復經留差一年臣何才能得終此役夙夜籌思惟有查興未盡之工以全三吳之利庶幾圖報涓埃於萬一耳隨經脩查蘇松二府尚有支河數處如三丈浦澱山湖口千墩浦夏駕浦大瓦浦青魚涇橫瀝塘蟠龍塘南橋塘通波塘竹岡河橫塘橫泖諸河皆吞吐江海要道工不容已譬之幹河猶人身之腸胃也支河猶人身之

經絡也不先開幹河如腸胃痞塞何以通飲食幹河開矣而支河不治即如腸胃雖通而經絡尚有不貫亦豈得為完醫哉所據錢糧匱乏地方災傷難責民力誠有如該道所言者臣以為水利之興民生國計胥賴也今民力已困矣公帑且匱矣益責之民情既有所不堪盡取之官財亦難乎其繼若不通融酌處以終其事將業廢於垂成而功虧於一簣矣臣愚無知謂宜用民之半出力以赴工用官之半處費以給食如此則官雖費而

寓賑飢之仁民雖勞而忘枵腹之怨事無中輟利可畢興矣除常熟縣三丈浦該工費銀五千八百二十餘兩已經另行請給其澱山湖口至千墩浦該工費銀八百七十餘兩該臣查所管江防水利積有罰贖銀兩除每年解操江兵餉外尚餘銀七百有奇足以興工不敢混瀆外餘如蘇州府屬夏駕等浦松江府屬橫瀝等塘工費煩鉅計共該銀三萬六千餘兩別無措處相應具題伏乞勅下工部備行查議如果臣言不謬即咨劄撫按

官督行該道作速處給官銀一半容臣相兼民力刻期
興工以全二府之水利完日通將處過官銀用過民力
開過工程數目造冊奏繳東南之民幸甚為此具本謹
題請旨



三吳水考卷十二